

四庫全書

史部

# 欽定四庫全書

史部

會稽志卷八

詳校官監察御史臣沈孫璉

檢討臣德生覆勘

總校官知縣臣楊懋珩

校對官編修臣盧遂

謄錄監生臣陳元熙

欽定四庫全書

會稽志卷八

宋施宿等撰

寺院

嵯縣

惠安寺在縣西一百五十里剡山之下晉義熙二年  
南天竺國有高僧二人入金華師道深弟子竺法友  
授阿毗曇論一百二十卷甫一宿而誦通道興遂讚  
法友曰釋家重興今先授記遂往剡東邛山

東邛山今屬新

昌縣復於剡山立般若臺寺獵士陳惠度射鹿此山鹿

孕而傷既產以舌舐子身乾而後母死惠度棄弓矢  
投寺出家後為名僧鹿死之處生草號鹿胎草會昌  
廢咸通八年重建改法華臺寺天祐四年吳越武肅  
王改興邑寺大中祥符元年改賜今額

宣妙寺在縣西四十五里宋元嘉二年建號崇明寺會  
昌廢晉天福四年重建治平三年改賜今額

安福寺在縣南六十里梁永明二年置唐會昌五年廢

景福元年重建

上鹿苑寺在縣西四十五里寺山自太白山來宋元嘉七年姚聖姑於西白山造寺賜披雲院額會昌廢咸通七年重建改咸通披雲院晉天福七年吳越改披雲寺

下鹿苑寺在縣西四十五里寺山亦自太白山來其上即披雲寺宋元嘉二年建號靈鷲寺會昌廢咸通十四年重建山有瀑布及龍潭寺治平元年改賜今額明覺寺在縣南二十里梁大通元年智遠法師建號禪

林寺會昌廢晉天福元年重建大中祥符元年改賜  
今額

禪會寺在縣西二十里傳者以為齊景明元年安南將  
軍黃僧成家天雨錢捨以造寺號錢房院梁天監中  
改禪房寺會昌毀廢咸通二年重建後改賜今額

福感寺在縣東二十五里晉天福四年建號報恩寺大  
中祥符元年改賜今額

實性院在縣西二百五十步唐乾元中建號清泰院會

昌廢晉天福七年重建大中祥符元年改賜今額

寶積院在縣北三十里後唐長興四年建號德興院大中祥符元年改賜今額

龍藏寺在縣北四十五里梁天監二年建號龍官院會昌廢咸通十四年重建浙東觀察使李紳少年寓此肄業有紳所為碑存大中祥符元年改賜今額

普惠寺在縣西四十里齊永明三年建號安養法華院會昌廢乾符六年重建治平三年改賜今額

普安院在縣東二十五里宋元嘉二年建會昌廢後唐  
清泰二年重建

戒德院在縣西四十里齊永明三年建號光德院會昌  
廢晉天福七年重建治平二年改賜今額

定林院在縣西四十五里宋元嘉二年建號松山院會  
昌廢晉天福八年重建有響巖龍潭治平三年改賜  
今額

圓超院在縣西二百五十步院山與郊山相連舊曰靈



岫菴晉天福六年建奉國院有觀音靈異祈禱必應  
西無有亭臨雙溪之上溪山勝絕政和間衛人盧駿  
元天驥為提點刑獄行部至此命其亭曰挾溪題詩  
云孤亭瞰平野雙溪分兩腋野濶春風香溪晴照人  
碧駿元工詩能書札仕至吏部侍郎寺前松嶺之側  
有瞰山堂下瞰城邑前對羣山昔人留題甚多邑士  
傳誦一聯云近離城市不多地高壓樓臺無限家莫  
知誰氏作也今堂廢久矣

真如院在縣西四十里周顯德三年建號寶壽院大中祥符元年改賜今額

尊勝院在縣東四十里宋元嘉二年建號厚山院會昌廢咸通十一年重建久之又廢晉天福六年重建治平三年改賜今額

天竺院在縣西二十里晉天福七年建號西明院大中祥符元年改賜今額

靈巖院在縣西七十里唐乾符三年于茹蘭禪師伏虎

歇食巖下古石門寺基上建有石門龍潭

法祥院在縣東七十里宋元嘉二年建號延福院會昌  
廢後唐清泰二年重建大中祥符元年改法朗後以  
犯聖祖諱改今額

超化院在縣北三百步晉天福七年建號水陸院大中  
祥符元年改賜今額

瑞像院在縣東一百步唐景福元年吳越武肅王建

法華院在縣東關百步唐龍紀元年建

南巖廨院在縣東二百步唐龍紀元年建

清隱院在縣東七十里唐大中七年建號三峰院院後  
有山三峰故曰三峰治平三年改賜今額

大明院在縣西南二十里晉天福七年建號資國大明  
院大中祥符元年改賜今額

證道院在縣西四十里晉開運元年建號五龍院後改  
今額院晉高僧帛道猷道場山有龍潭

華藏院在縣東四十五里晉開運二年建號雲峰院大

中祥符元年改賜今額

皇覺院在縣西關十里漢乾祐三年建號仙巖院大中

祥符元年改賜今額葛仙翁釣臺石梯在其傍

顯淨寺在縣西關十里齊永明三年建號青林寺會昌

廢後唐長興元年重建大中祥符元年改賜今額

報恩院在縣西二十里唐乾寧元年建號報德院大中

祥符元年改賜今額

資福院在縣東二十里晉天福八年建號增福院大中

祥符元年改賜今額

空相院在縣南四十里太平興國元年建號開明院大

中祥符元年改賜今額

悟空寺在縣西

闕

十里周廣順元年於古烏流寺基上

建號保安院治平二年改賜今額

安國院在縣西六十五里晉天福七年建號太平院治

平三年改賜今額

明心院在縣北二里建隆二年陳鄴捨宅建號黃土塔

院大中祥符元年改賜今額

諸暨縣

大雄寺在縣西

關

里梁普通六年大智禪師建號法樂

寺會昌廢大中二年重建改報國寺後改賜今額

咸通保壽寺在縣西南一十一里唐大中八年僧神智  
建號大中聖壽寺咸通十年改賜今額寺碑實唐人  
書

廣壽寺在縣南二里梁大同二年左僕射吳文寵捨宅

建號延壽寺會昌廢咸通十年重建後唐天成三年  
改長壽寺後改今額

闕城寺在縣東北八十五里晉天福七年建周顯德二  
年吳越給靈根寺額大中祥符元年改賜今額

青蓮院在縣西一十八里天福四年建號碧泉院至道  
二年改賜今額

三學禪院在縣西六十里唐元和三年曹溪第四代靈  
默禪師建咸通六年賜五洩永安禪院額天祐三年



改應乾禪院後改今額自夾巖山峰并五洩溪響鐵  
嶺盡屬之

寶乘院在縣北二十里後唐同光二年吳越武肅王建  
號石佛院大中祥符元年改賜今額

永慶院在縣北五里唐天祐元年建號五峰院

法海院在縣南三里二百步唐大中八年僧神智建號  
保壽禪院大中祥符元年改賜今額

慈氏院在縣西北一十八里晉天福七年建號玉泉院

大中祥符元年改賜今額

彰聖院在縣東南七十里唐咸通十四年建號古靈院  
大中祥符元年改賜今額

香社院在縣南三十里隋樓世幹捨宅建會昌廢大中  
元年重建院有連理木咸通元年賜木連院額後改  
今額

雲峰院在縣西南五十里唐中和二年長老可伏於蔣  
洞穴建大順中賜靈洞翠峰院額後改今額洞名白

雲

安隱院在縣東北六十里唐咸通十二年建廣明二年  
賜國慶院額後改今額

靈峰院在縣北六十五里後唐長興二年建號溪山院  
後改今額

淨觀院在縣西一里唐天祐元年建乾德二年吳越給  
翠峰院額後改今額有范蠡祠相傳云范蠡宅也山  
上有鴟夷井寺有仁宗朝賜經二藏又有范文正公

題詩石刻

闕

院在縣東北七十五里後唐長興五年於古資聖  
院基上建太平興國元年改精進院後改今額

闕

院在縣北七十里唐貞元十四年智藏禪師建惠  
操禪師後復居此咸通八年賜額

智度院在縣北一里五十步唐景福二年建號香積院  
大中祥符元年改賜今額

保福院在縣東北八十里唐咸通八年建乾符二年號

保唐禹泉禪院又改保錢院後改今額

崇壽院在縣西南二十里乾德二年建號寶泉院大中祥符元年改賜今額

崇勝院在縣東南四十五里唐貞觀十五年千歲禪師開巖建會昌廢大中重建咸平二年改華嚴般若院後改今額

延慶院在縣東南七十里唐貞觀元年建有千歲禪師修行於此因號道場院會昌廢咸通八年重建又號

溪山院周顯德五年改興福永安院大中祥符元年  
改賜今額

法善院在縣西二十五里唐文德元年建號普廣院大  
中祥符元年改賜今額

道林院在縣北七十里唐天祐元年於古寶華院基上  
建周顯德四年吳越給洩巖院額大中祥符元年改  
賜今額

鍾山院在縣南五十里梁普通中伏虎禪師住持之地

唐咸通八年建

法藏院在縣東南八十里周顯德二年建號官田院大  
中祥符元年改賜今額

延祥院在縣東北四十里晉天福七年建號清福院大  
中祥符元年改賜今額

咸通西岳院在縣東北六十里本丁令威鍊丹之地丹  
井存焉梁朝僧法成建咸通八年賜額

藥師院在縣西四十里唐咸通四年建廣明元年賜額

薦福院在縣東七十里開寶四年建號報恩院大中祥符元年改賜今額

上普潤院在縣東南二十五里本千歲和尚所居有小石巖上有文殊普賢像晉天福七年建號醴泉院後改今額

下普潤院在縣東北二十五里太平興國元年於古靈瑞院基建號石井院後改今額

明教院在縣西南六十里晉天福七年建號仁豐院大



中祥符元年七月改通教院天聖初以章獻明肅太后家諱避通字如改通進司為承進司通州為達州諸州通判為同判通事舍人為宣事舍人之類是也餘至仁宗皇帝親政皆復故惟通州遂為達州至今不復改如明教院額亦是也

淨土院在縣北五里唐天祐元年法雲大師建號五峰塔院大中祥符元年改賜今額

永慶院在縣南五十里周顯德元年建號永光塔院大

中祥符元年改賜今額

法雲院在縣東五十里晉開運二年建號龍安院

化成院在縣東五十二里梁大同二年建會昌廢開寶

四年重建號紫巖院後改今額

慈光院在縣東四十里梁靈智禪師結庵之地唐咸通

五年建號通化院後改今額

崇法院在縣西一里本唐白鶴觀基開寶四年建號水

陸院大中祥符元年改賜今額

顯教院在縣西南七十里本唐忠國師道場晉開運四年建號忠山院大中祥符元年改賜今額

離相院在縣東南九十里晉天福四年於歸一禪師塔院基上建號福田院後改今額

永福院在縣東南二十五里因梁武帝書堂基建號應國禪院有闕水井會昌廢晉天福七年重建改今額有米元章禮部所書二碑

淨住院在縣南六十里唐永貞二年建號龍潭禪院會

昌廢建隆三年重建改安福院大中祥符元年改賜  
今額

崇教院在縣南六十五里唐貞觀元年建玄寂禪師塔  
院會昌廢周廣順元年重建高松院後改今額

清涼院在縣東南九十里漢乾祐二年建號上林院後  
改今額

薦嚴院在縣北五十里唐咸通八年建號香嚴院後改  
今額院有台州刺史康希銑碑趙州刺史徐嶠書

明覺院在縣東五十五里周顯德四年建號靈峰院後  
改今額

栖巖院在縣西南五十里唐景福元年建號高峰院後  
改今額

淨隱院在縣東南一百里晉開運三年建號崇化院後  
改今額

正覺院在縣東六十里晉開運元年建號菩提院後改  
今額

歸寂院在縣西五十里唐天祐五年建號歸寂塔院後  
改今額

宣妙院在縣北七十里唐咸通二年建號妙興院後改  
今額

香林院在縣西南二十五里漢乾祐三年建號松林院  
後改今額

雲就院在縣北七十里晉天福五年建

梵惠院在縣西南四十里乾德四年建號淨福院後改

今額

廣福院在縣南六十里周顯德三年建號鴻福院後改

今額

資聖院在縣西二十五里唐天祐三年建號應乾解院

皇祐元年改賜今額

普濟院在縣北七十里乾德五年建號通濟院天聖元

年閏九月改明濟治平三年改賜今額

天曹院在縣西四十里開寶五年建

寶林院在縣南六十里晉天福四年于玄寂禪院基上  
建

雲居院在縣南四十五里唐天祐六年鑒其大師建貞  
明四年賜越山禪院額治平三年改賜今額

解空院在縣東南九十里建隆二年建號法訢院後改  
今額

四果院在縣東北七十里晉天福三年吳越文穆王建  
號保安羅漢院大中祥符元年改賜今額



大厯廣福院在縣南四十五里本唐大厯院紹興三年僧道雄重建仍以大壽聖為額三十二年改賜今額嘉福院在縣南六十五里乾德五年于懷靜禪師院基上建號嘉善院後改額今廢

蕭山縣

祇園寺在縣西北一百步東晉咸和六年許詢捨山陰永興二宅建寺號崇化穆帝降制云山陰舊宅名曰祇園永興新宅號曰崇化會昌廢建隆元年重建寺

有閣藏仁宗皇帝御書後歸寶文閣治平三年改賜  
今額

覺苑寺在縣東北一百三十步齊建元二年江淹子昭  
玄捨宅建會昌廢大中二年重建賜名昭玄寺祥符  
中避聖祖名改今額寺有大悲閣熙寧元年沈睿達  
為之記又作八分書寺額四字筆意極簡古閣後  
壁有毘陵戚舜臣水戚氏以畫水名家此壁尤為識  
者所賞并睿達文及書謂之三絕或詆戚氏以為似

印板水紙過矣

廣化寺在縣南四十里梁大通二年建號法興寺會昌  
廢咸通十三年重建治平三年改賜今額

覺海寺在縣南四十里唐會昌元年建號政信寺五年  
廢晉天福四年重建祥符元年改賜今額

慈雲寺在縣西南四十里梁天監十二年僧寶誌於許  
玄度宅基上建號開善資寶寺會昌廢晉天福三年  
重建祥符元年改賜今額

惠濟院在縣東北一百五十步晉天福五年悟真師於古崇寺基上建號資國看經院太平興國七年改惠通院治平三年改賜今額

淨土院在縣西一里唐開寶五年於古善明寺基上建號彌陀院太平興國七年改賜今額

正覺院在縣東五十步後唐天成元年吳越武肅王建號十善院院有浴室王絲父宸建謝絳為銘祥符元年改賜今額

廣慈禪院在縣南七十里梁大同二年建號安禪寺隋  
大業十三年廢晉天福七年重建吳越改保安禪院  
景德二年改今額寺多勝槩范希文葉道卿元厚之  
沈存中施正臣唐彥猷晁美叔吳伯固皆留題其中  
又有柳郎中永題會景亭有分得天一角織成山四  
圍之句永以樂府得名此詩雖不高亦不失為工也  
真濟院在縣南三十八里唐武德七年建會昌廢晉天  
福六年重建吳越文穆王給興國禪院額太平興國

七年改賜今額

和慶院在縣南六十五里唐天祐十六年建號龍門院  
祥符元年改賜今額

明化院在縣西一十二里後唐長興三年吳越文穆王  
建號化度院景德三年改今額

開善院在縣東四十里晉天福元年建號資化院祥符  
元年改賜今額

淨惠院在縣南三十五里晉天福八年建號妙緣院祥

符元年改賜今額

廣法院在縣西一十二里後唐天成元年建號六通救

苦禪院祥符元年改賜今額

廣福院在縣西南七十里後唐同光元年建號龍門護

國院毀於建炎紹興二十九年僧妙通重建鞏太監

湘為記祥符元年改賜今額

資教院在縣東一十四里晉開運三年建號崇真院祥

符元年改賜今額

興法院在縣東四十里梁大同三年建號大翔寺隋大業十三年廢晉天福八年重建吳越改寶乘院祥符元年改賜今額

淨土院在縣南八十里梁大同二年白敏將軍捨宅建號白塋寺會昌廢咸通九年重建祥符元年改賜今額

資福院在縣西一十二里周廣順元年建號妙福院祥符元年改賜今額



重興院在縣西九十里本晉許徵君巖下寺會昌廢咸  
通十四年重建改賜今額

顯教院在縣南一十五里乾德二年建號崇福院舊有  
閣面衆山曰環翠為士夫登覽之所寺僧厭庸鄙客  
數至乃易為諸天閣與山相背無復舊觀治平三年  
改賜今額

興教院在縣南一百里唐天祐二年建號靈峰院祥符  
元年改賜今額

普惠院在縣南八十里唐天祐二年建號華嚴院祥符元年改賜今額

聖果院在縣西南四十五里唐咸通九年建號靈峰萬壽院治平三年改賜今額

資利院在縣東三十里舊係白鶴接待院紹興十五年僧請于府乞以迴向資利院舊額歸焉

栖真院在縣南七十里漢乾祐二年建號福安院治平三年改賜今額

興善院在縣東五十里晉天福三年建號新興院治平三年改賜今額

靈峰院在縣南八十里周顯德六年建號郭峰院治平三年改賜今額

法印院在縣南九十里周顯德二年建號法華院治平三年改賜今額

六和院在縣南六十里漢乾祐元年建號六通典福院治平三年改賜今額

崇因院在縣南六十里漢乾祐二年建號崇明院治平三年改賜今額

隆興寺在縣西一里舊係接待院乾道五年僧請于府乞以隆興寺舊額歸焉

餘姚縣

龍泉寺在縣西二百步東晉咸康二年建唐會昌五年廢大中五年重建咸通二年改今額龍泉在寺山王荆公有絕句所謂四海蒼生待霖雨不知龍向此中

蟠今有大字刻于泉傍蓋後人倣公書為之非真筆也高宗皇帝巡幸時泊御舟於亭前江中寺又有碑乃虞世南撰武后天授中布衣董尋書世南止曰虞南蓋避太宗諱按太宗在位時羣臣皆不避其名如虞世南蘇世長李世勣等是也世勣至高宗初乃去世字止曰李勣猶用古禮卒哭乃諱之文世南卒於太宗時未嘗單名南此碑蓋書人追去之也

九功寺在縣西一十五里齊建元中越州刺史榮頴捨

宅建號休光寺會昌廢大中十二年重建周顯德五年吳越武肅王修改今額

圓智寺在縣南一里齊永明元年建號禪房寺唐天寶四年改大法寺會昌廢咸通元年重建大中祥符元年改賜今額

建初寺在縣南二百步晉太和元年建號平元寺會昌廢周顯德四年重建吳越改興元寺大中祥符元年改賜今額

普滿寺在縣東北一十五里周顯德六年建號靈瑞塔  
寺大中祥符元年改賜今額

廣安寺在縣西北五十五里唐乾寧三年建號報恩寺  
尋廢漢乾祐二年重建大中祥符元年改賜今額

長慶院在縣東北三十五里唐長慶四年建號柯城道  
場院會昌廢大中二年重建天祐六年吳越改今額  
羅漢院在縣東一里三十步梁大同元年建號棲閑院  
會昌廢周顯德四年高景淮重建改賜今額

應天鎮國禪院在縣西一里龍泉山之上唐大中五年  
何延疎等建號聖德禪院咸通十五年改賜今額

悟法院在縣西南六十里梁天監元年建會昌廢大中  
元年重建號四明寺天祐八年吳越改東明禪院大  
中祥符元年改賜今額

普濟院在縣東北六十里唐大中元年建號上林院大  
中祥符元年改賜今額在上林湖山之西麓俗謂之  
西寺山勢回抱地學者多稱之以為可亞四明之天



童山陳康肅公為漕案行審所嘗來遊有詩云山遠  
峰峰碧林疎葉葉紅凭欄對僧語如在畫圖中今刻  
石寺中

隆慶院在縣東北六十里梁大同元年建號上林院唐  
文德元年改仙居院大中祥符元年改賜今額俗謂  
之東寺山有仙人跡深寸又有淨聖泉大旱不枯謝  
師厚景初題詩邑中頗多其上林湖山詩云山水有  
奇秀何必耳目親茲地世未知偶游良可珍平湖瞰

其中翠巘圍四垠青松千萬植落瀑如懸巾佛廟聳  
殿塔裝點繪畫新清溪與斷崖水石聲磷磷峰巔見  
蒼海日出嘗先晨花草時節異寧問秋夏春陵谷千  
萬古豈無稱道人得微言不信又恐遠故堙尊酒且  
樂我醉來事事均題觀仙居山瀑布云落泉下峭壁  
斗絕千萬丈濺急雪片飛望若匹練廣曲嶺隔青松  
三里已聞響其旁有巨石平潤可俛仰愚俗所不道  
我輩偶來賞須期秋色清攀蘿將爾上師厚希深之

予一代名士詩尤得名歐陽文忠公梅聖俞王文公  
皆推之黃魯直娶其女自言從謝公得句法

如意院在縣東北三十五里晉天福六年建號保安院  
大中祥符元年改賜今額

寶積院在縣西三十五里晉天福六年建號保安院大  
中祥符元年改賜今額

廣教院在縣西北四十五里晉天福六年建開山僧於  
土中得石佛五尊奏請賜號瑞明大中祥符元年改

賜今額

西福昌院在縣東北三十五里周廣順元年建號烏山  
資福院大中祥符元年改永安院政和元年以寺犯  
陵名改賜今額

普明院在縣西北三十五里漢乾祐元年建號松山報  
恩寺大中祥符元年改賜今額

東福昌院在縣東北七十里唐長慶四年建會昌廢大  
中二年重建吳越給永壽院額大中祥符元年改賜

今額

建福院在縣西北三十五里梁天監元年建號天香院  
隋大業元年毀周顯德二年重建改天華院大中祥  
符元年改覺朗院崇寧元年改賜今額

普圓院在縣南三十五里後唐清泰元年建號化安院  
大中祥符元年改賜今額

法性院在縣東二百三十步晉天福七年邑人於古大  
寧寺基上建有大士像隨潮而至父老迎寘於院改

觀音院大中祥符元年改賜今額

靜凝教忠寺在縣西北五十里本號姜山院祠一女子  
曰孟姜不知何世人也俗傳謬妄可笑會昌廢晉天  
福二年重建改報國興福院大中祥符元年改靜凝  
院隆興元年李莊簡公家請為功德院增教忠二字  
清果院在縣東北七十里晉天福七年建號鹿田院治  
平三年改賜今額

禪慧院在縣東北七十里晉天福七年建號精進院治

平三年改賜今額

明真院在縣南三十里靈源山後唐長興元年建號四  
明院治平三年改賜今額

雙林院在縣東南四十里唐天祐元年建號雙桐院治  
平二年改賜今額

正覺院在縣南二十五里唐天祐元年邑人邵訥捨山  
建會高麗僧永乾游方至此乃請居焉為開山祖晉  
天福中吳越文穆王給昭覺院額治平三年改賜今

額

極樂院在縣南一里漢乾祐元年建號彌陀院治平三年改賜今額

超果院在縣西南一十五里唐天祐元年建號越安院治平三年改賜今額

普安院在縣南一十五里晉開運二年建號興安院治平三年改賜今額

慈聖院在縣南七十里晉開運二年建號白雲院治平



三年改賜今額

嘉福院在縣東北四十里

報先院在縣南五十里紹興二十一年主奉吳王祠事  
乞移東京報先院額建

勝果院在縣東北三十里紹興七年右從事郎張昉乞  
移應天府勝果院額建昉文定公曾孫

地藏院在縣西南一里

上虞縣

等慈寺在縣東一里梁天監二年建始曰化民院後改  
上福禪院會昌毀廢咸通元年重建後唐長興四年  
改上福寺祥符元年又改等慈後廢于火長老智策  
台州人道譽甚盛自號塗毒巖主既至等慈首創三  
門極於閎壯

長慶寺在縣北四十里咸通二年建號永壽寺大中祥  
符元年改賜今額

興教禪院在縣西南四十里唐乾符六年建號建福院

天祐三年吳越改象田院太平興國九年改賜今額  
戒德院在縣西北五十里唐大中十年建咸通九年賜  
名義讓寺治平二年改賜今額

上秉院在縣西南七十里在唐為休光寺大善道場嘉  
猷禪師奏建會昌毀廢大中五年三白和尚道全重  
建咸通九年更為大興善禪院越州觀察使李鄴書  
額治平三年改賜今額

智果院在縣東十里後唐清泰元年建號建福院大中

祥符元年改賜今額

國慶禪院在縣西南五十四里唐元和四年安禪師建咸通九年賜今額即謝太傅故宅也

明教院在縣西北二十里後唐清泰元年建號仙壽院大中祥符元年改賜今額

里明院在縣西北四十里唐大順二年於古興善寺基改建尋賜機證禪院額其額用絹素書今存同光四年吳越改給今額

普靜院在縣西北七十里晉天福七年號報恩院大中祥符元年改賜今額

法果院在縣西南五十里晉天福六年建號舍珠院初閩僧從契栖隱於此邑人馮貴為創禪齋焉大中祥符元年改賜今額

棲禪院在縣南三十五里唐開成三年建號錢溪院會昌廢光化元年重建天復三年吳越改錢溪羅漢院大中祥符元年改賜今額

咸通寶泉院在縣南五十里唐大中七年建成通六年  
賜額

智度院在縣西南三十里晉天福七年建號光相院舊  
寺在黃茅嶺下和尚山之巔遺址宛然寺之未遷也  
其鐘磬之聲與今寺之山相應後乃遷此大中祥符  
元年改賜今額

諸林院在縣東南七里後唐長興三年建漢乾祐二年  
吳越給額

勝因院在縣南六十里晉天福七年建號永清院大中祥符元年改賜今額

澄照院在縣南四十里晉天福二年建號涼泉院大中祥符元年改賜今額

東資聖院在縣東南十五里晉天福八年建號聖壽院大中祥符元年改賜今額

法界院在縣北一十里唐咸通二年建後唐同光二年吳越給利濟院額大中祥符元年改賜今額

栖仁院在縣南三十五里唐天復三年僧行先建晉天  
福七年吳越給額

太岳院在縣南五十里本晉白道猷結菴之地後唐清  
泰元年陳師益等建

乾符報恩院在縣南四十里唐乾符三年建

明因院在縣東南一十里晉天福五年建開運四年吳  
越給福泉院額治平三年改賜今額

瑞像院在縣西南一十五里晉天福六年於古南源院



基上建開運四年吳越給額

西資聖院在縣南五里唐咸通七年姜進思捨地建八年給額

海惠院在縣東南十五里晉天福七年建漢乾祐二年吳越給仙鳳院額治平三年改賜今額

化度院在縣東南一十里晉天福五年建號雲溪院大中祥符五年改賜今額

廣教院在縣西四十里開寶四年有僧築菴山下鎮國

軍節度使

闕

事治因建為寺易名保安治平三年賜

今額國初嘗置官窑三十六所於此有官院故址尚

存

奉國報恩院在縣西南二十五里唐元啓二年建

廣明寶蓋禪院在縣南五十里唐廣明二年建

淨衆院在縣西北五十里晉天福四年建賜名見明院

治平二年改賜今額

福祈禪院在縣西北三十五里晉天福四年建

福仙院在縣西北三十里唐咸通八年建

湧泉院在縣南二十里漢乾祐二年建

### 新昌縣

寶相寺在縣西南一十里齊永明中僧護鑿石造彌勒像建寺號石城至梁天監十二年像始成身高百尺劉勰作記唐會昌五年建三層閣改寺曰瑞像閣大中祥符元年賜今額以歲久傾圯淳熙元年僧智高一新之漢嘉所謂大佛者高千尺過此殆十倍黎陽

大佛者又加大馬嘗亡盜數人捕不可得久之乃  
於佛耳中獲之

雲居寺在縣東北三十里宋元嘉二年建會昌毀廢晉  
天福九年吳越重建號石門寺大中祥符元年改賜  
今額

大明寺在縣東北二十五里昔沙門法乾支道林帛道  
猷下築東岬山晉隆和元年賜號東岬寺會昌毀廢  
後唐同光元年重建後徙高碑大中祥符元年改賜

今額

七寶院在縣西南五里舊號元華寺齊永明中孟蘭法師建會昌廢晉開運三年趙仁奐見巖龕有石佛千身重建院宇改千佛院大中祥符元年改賜今額

福聖院在縣北八十步周顯德元年僧昭度建五年吳越給無礙浴院額大中祥符元年改賜今額

寶嚴院在縣西九十步晉開運二年趙仁奐建漢乾祐二年吳越給釋天院額大中祥符元年改賜今額

慧雲院在縣東南六十里唐會昌六年僧師祐建後唐清泰二年吳越給九巖院額大中祥符元年賜今額東廡有水出石罅間名蒙泉

興善院在縣西南四十里晉太康十一年西域僧幽閑卜築於此號新建寺會昌廢大中元年重建廣明元年賜號興國禪院治平三年改賜今額

祖印院在縣西南二十里宋元嘉中建號南宕院會昌廢咸通八年重建大中祥符元年改賜今額

廣福院在縣東南六十里周廣運元年大寂禪師德韶  
建號天姥院至道三年改賜今額

沃州真覺院在縣東四十里方新昌未為縣時在剡縣  
南三十里居沃州之陽天姥之陰南對天台山之華  
頂赤城北對四明山之金庭石鼓西北有支遁養馬  
坡放鶴峰東南有石橋溪溪源出天台石橋故以為  
名晉帛道猷竺法潛支道林乾興淵支道開咸蘊崇  
實光誠斐藏濟度暹印皆常居焉會昌廢大中二年

有頭陀白寂然來遊戀戀不能去廡使元微之始為  
卜築白樂天為作記以為東南山水越為首剎為面  
沃州天姥為眉目其稱之如此舊名真封寺不知其  
始治平三年賜今額

列翠院在縣西南二十里宋元嘉二年建唐咸通八年  
賜額

鷲峰院在縣東南六十里本號靈巖院唐天寶三年建  
會昌廢後唐清泰二年重建嘉祐七年改賜今額



天宮院在縣東北三十里本號靈居院梁普通元年建  
會昌廢大順元年重建治平三年改賜今額

華藏院在縣東南六十里本號龍巖院唐龍紀元年僧  
文肅建治平三年改賜今額

昌法院在縣東四十里本號靈慶院周廣順元年建治  
平三年改賜今額

保福院在縣東一十五里本號遵德保安院周顯德三  
年建治平三年改賜今額

香林院在縣東北三十里本號梅林院周顯德四年建  
普閏院在縣西三十五里晉天福六年建號華嚴院後  
改清潭院治平三年改賜今額

普門院在縣東三十里本號觀音院晉天福八年建治  
平三年改賜今額

方廣院在縣東北一十五里元號華嚴院乾德六年建  
治平三年改賜今額

戒壇

開元寺昭慶戒壇咸平四年寺僧曉原立浮屠之法必  
受戒二百五十乃成為桑門不然雖已祝髮或已說  
法為人師猶謂之沙彌而已所謂高沙彌者是也戒  
壇舉天下財二三所往往行數千里受戒其後寢多  
今處處有之會稽戒壇在開元寺賜額曰昭慶遇聖  
節則開以傳度其徒以為盛舉有臨壇僧二十餘皆  
推擇有行業者府為給帖初戒壇四面皆為天王及  
日月星宿之象而僧踐其上宣和初詔禁之皆毀去

然近歲創者亦復有之矣

尼戒壇在大慶寺大殿之後

道戒壇每年聖節就天慶觀三清玉皇大殿

接待

會稽樊江接待院

平水石碑頭接待院承節郎馬正卿造

太平山接待院本謝敷舊隱從事郎錢筠年於進士鍾  
邦俊所捨基內蓋造法堂庫堂三門仍買田辦供邦

俊又自益造僧堂及買田并柴山

山陰虹橋接待院紹興五年僧法宥師覺募緣蓋佛殿  
及建藏

三江玉山觀音堂接待

嵯縣黃沙接待院

諸暨中浦接待院紹興初臨安府靈芝大智律師元照  
創立慶元元年監左藏西庫呂昭量買田辦供又募  
衆蓋造佛殿法華懺堂三門浴室府庫等

紫巖岳厨接待院

新昌開巖接待院

餘姚西橫河接待院

仙亭接待院

施水

稽山門施水坊

欒宮步觀音懺堂施水


昌源施水坊

常喜門外跨湖橋施水坊

沉釀堰施水坊

梅市真隱施水坊

九里施水坊



會稽志卷八



# 欽定四庫全書

史部

會稽志卷九

詳校官監察御史臣沈孫璉

檢討臣德生覆勘

總校官知縣臣楊懋珩

校對官編修臣盧遂

謄錄監生臣陳元熙

欽定四庫全書

會稽志卷九

宋施宿等撰

山

府城

卧龍山府治據其東麓隸山陰舊經云種山一名重山  
越大夫種所葬處太平御覽種山之名因大夫種以  
語訛成重也寰宇記隋開皇十一年越國公楊素於  
種山築城自隋迄唐即山為州宅吳越備史云遜王

侔於卧龍山西寢後置園亭栽植花竹周徧高下旦  
暮登臨訖于四時侔能為歌詩亭榭間紀錄皆蒲卧  
龍山名始見於此國朝康定初范文正公撰清白堂  
記云會稽府署據卧龍山之北足上有蓬萊閣嘉祐  
末刁景純撰望海亭記云越冠浙江東號都督府府  
據卧龍山為形勝山之南亘東西鑑湖也山之北連  
屬江與海也周連數里盤屈於江湖上狀卧龍也龍  
之腹府宅也龍之口府東門也龍之尾西園也龍之

脊望海亭也先是越勾踐初飛翼樓取象天門東南  
伏漏石竇以象地戶陵門四達以象八風因山勢畚  
築為城一千一百二十步至唐人以樓址為望海亭  
其後亭閣崢嶸踵起相望與其山川暎帶號稱仙居  
元微之夸州宅示白樂天詩云謫居猶得近蓬萊樂  
天荅云大夸州宅似仙居微之題望海亭云湖山四  
面爭氣色曠望不與人間同東坡詩云卧龍盤屈半  
東州秦少游詩云共躡丹梯上卧龍他詩多不悉載  
山西北幽徑蔽虧傍皆叢篁灌木其地缺齧不整傳  
云大夫種墓曩因潮水穴山後失其尸也前太守申

約束止樵採務在封殖以為軍府茂暎然百年喬木

成章者可數園林竹樹雖敷榮擢秀大抵多比歲所

植也地出佳茗以山泉烹瀹為宜

景祐中蔣吏部堂閔山序云府山一

名卧龍為一境形勝予視事之明日見其竹樹零悴僅有半在問吏曰為昔人剪伐使然自謂非予守土此山殆將童矣於是申約束止樵採作閔山詩云東南亘羣山形氣或斷續茲山窮嶄絕孤峙越之腹呼吏對泉石申禁葑林麓熙寧十年程給事公闢植松千餘章於山上秦少游撰樂安公唱和詩序云昔樂安蔣公以山富草木樵蘇所採令於公府止之湖地沃衍田被豪奪為表於朝廷復之又廢山西淫祠引湖流為流觴曲水丈山水閣棹歌之詩至今稱焉程公能述樂安公之志狂枝惡蔓斬薙以時秀甲珍芽

無得輒取春秋佳日開池築具舟楫與民共遊而樂之隆興二年吳給事關卧龍山草木記云越城入

山蜿蜒奇秀者卧龍山也山之陽州宅據其下是宜林木叢茂乃大不然驅鈴下卒輦糞壤除榴翳種竹萬竿桃李千本方將藝茶於秋栽松於冬植花卉於春以盡復舊觀而予還朝矣飭吏枚數竹之數令所植外凡得千百餘根併列于碑陰大夫種墓舊亡其處輿地志云種山西缺處是也范公清白堂記云山巖之下獲廢井視其泉清而白色味之甚甘以建溪日鑄卧龍雲門之茗試之甘液華滋說人襟靈張伯玉蓮菜閣記自注卧龍山茶冠吳越

山南舊傳白樓亭今遺址無所考山巔城隍祠其西南越王臺下為威果營營有烏龍井連營居民

櫛比為卧龍坊

舊經引孔曄會稽記云種山南有白樓亭江夏太守宋輔於此立學

教授沛國豆儼避地至會稽聞陳業賢往候之不  
見臨去入交州留書繫白樓亭柱而別世說又云  
許玄度孫興公共於此商略古今賢達支道林聞  
之云二公故自有才情注白樓亭在山陰臨流映  
壑十道志云白樓山飛翼樓山南頭也白樓一作  
百樓蓋種山之南先有白樓亭故山亦以此名信  
如志言飛翼樓山南頭今望海亭即其地也或云  
自山西百餘步出常喜門今尚有白樓堰云自吳  
越以後山以卧龍  
著故他名寢泯

龜山在府東南二里二百七十二步隸山陰一名飛來  
一名寶林一名怪山舊經云山遠望似龜形故名越

絕云龜山句踐所起遊臺也東南司馬門因以灼龜  
又仰望天氣覩天怪也臺高四十六丈周五百三十  
步吳越春秋云城既成琅琊東武海中山一夕自來  
故名怪山寰宇記又云龜山下有東武里即琅琊東  
武山一夕移於此東武人因徙此故里不動山巔有  
巨人迹錫杖痕靈鰻井多寶塔遊臺一名觀臺唐徐  
季海詩云茲山昔飛來遠自琅琊臺孤岫龜形在深  
泉鰻井開李公垂詩云一峰凝黛當明鏡千仞喬松



倚翠屏元微之詩云一峰喚伏東武小兩峰鬪立秦  
望雄自郡齋南望屹然相對其浮圖侵雲漢張伯玉  
有清思堂雪霽望飛來山詩云隱几高堂上坐對飛  
來峰梵塔倚天半樓臺出雲中又題寺壁云一峰來  
海上高塔起天心秦少游錄寶林事實云越城凡三  
山能與秦望山為主客者卧龍寶林葢山也其城南  
左右數十里疾馳屹立皆屬於秦望又率其左右之  
山因鑑水謁于越城卧龍為郡守所治葢山少東不

能正受秦望之謁蓋越之形勢自卧龍而下未有如  
寶林者今寺名報恩光孝禪寺紹興初以濮安懿王  
園廟寓焉

山舊傳有聖母閣灼龜公冢許玄度書堂迹皆泯  
以井有靈鰻一名靈鰻岫昔有老僧旦暮鑿是山  
鑄鑿不絕又加以火灼醋淬巖崖幾盡故蔣吏部  
堂詩云聞之有茨芻歲久苦剝刻鑿聲響深崖火  
燼淬層壁平為土木基蔑有蒼  
翠色金粟千億身窳堵百餘尺

巖山在府西北六里一百七步隸山陰舊經云越王嗜  
巖採於此山故名晉王右軍羲之故居也按羲之傳

嘗在蕺山見一老嫖持六角竹扇賣之羲之書其扇  
各五字嫖初有愠色因謂嫖曰但言是王右軍書以  
求百錢嫖如其言人競買之他日嫖又持扇來羲之  
笑而不答今山下有題扇橋墨池鵝池戒珠寺寺有  
右軍祠堂唐衢州刺史趙璘直寺碑云句踐故城東  
北三里有山曰蕺蕺蔬類也傳云昔越君所嗜常採  
於此遂用名之

火珠山在卧龍山隅小而圜絕類龍頷之珠為浙東提

刑厝上有稽山閣西有識舟亭今廢

陽堂山在府南二里二百四步隸山陰一名鮑郎山

西有鮑郎祠

舊經云鮑郎東漢人名蓋生好獵死葬於此兒忽夢郎更生急開棺視之尸儼

然但無氣爾人事之頗有靈驗事見郡國記寰宇記

蛾眉山在府東二百九步隸山陰

白馬山在府東北三里三百一十六步隸會稽

彭山在府北三里三百一十六步隸會稽舊經云昔彭

祖隱居之城也有助海侯廟

會稽縣

會稽山在縣東南一十二里周禮揚州之鎮山曰會稽  
山海經云會稽之山四方上多金玉下多硃石勺水  
出焉史記云禹會江南計功而崩因葬焉命曰會稽  
會稽者會計也注禹到大越上苗山爵有德封有功  
因更名曰會稽吳越春秋禹還大越登茅山以朝四  
方羣臣乃大會計治國之道內美釜山州鎮之功外  
演聖德以應天心遂更名茅山曰會稽之山輿地志

云會稽山一名衡山其山有石狀如覆鬴亦謂之覆  
鬴山十道志云會稽山本名茅山一名苗山一名塗  
山禹行天下會稽名山因地為名吳夫差入越王以  
甲楯五千保會稽山太平御覽會稽之山古防山也  
亦名茅山又曰棟山越絕云棟猶鎮也即揚州之鎮  
山三國志虞翻曰南山攸居實為州鎮隋開皇十四  
年詔會稽等山並就山立祠唐開元十四年封四鎮  
山為公會稽南鎮曰永興公唐地里志會稽縣有南

鎮永興公祠即此山也自經史地志所著曰苗山曰  
茅山曰衡山曰釜山曰防山曰覆鬴又曰棟山亦曰  
南山實一山也東北接觀嶺其上有磐石屹立曰降  
仙臺一曰苗龍仙人臺永興公祠之側有茗隲淘沙  
徑思古亭遺址山南別峰曰石傘峰之下有唐齊抗  
書堂范蠡養魚池山西北五里即禹井禹廟今為告  
成觀又西百餘步有大禹寺非飲泉

山與宛委相接  
宛委山即禹穴

號陽明洞天按舊經引吳越春秋東南天柱號宛委  
乃禹藏書處在會稽山南三里則宛委別一山也又

舊經云會稽山周回三百五十里蓋總言東南諸山之隸會稽郡者如晉王彪之刻石山贊云會稽刻石山宋何胤傳云居會稽秦望山然則刻石秦望皆可以會稽山名之泊宅編云會稽東南巨鎮對崇梅李尖山謂之筆案其周回六十里此又兼言寶山也然則會稽云者諸山之通稱爾

秦望山在縣東南四十里舊經云泉嶺最高者輿地廣記云秦望在州城南為衆峰之傑秦始皇登之以望東海宋何胤居會稽秦望山山有飛泉西起學舍即林成垣因巖為堵別為小閣室寢處其中又於山側營田二頃講隙從生徒游之太平御覽云山



在州城正南涉境便見秦始皇帝登山以望南海自平地取山頂七里懸磴孤危峭路險絕攀蘿捫葛然後得至山上無甚高木當由地迫多風所致山南有譙峴中有大城王無餘之舊都也句踐語范蠡曰先君無餘國在南山之陽社稷宗廟在湖之南山有三巨石屹立如笋龍池冬夏不竭俗號聖水傍有崇福侯廟

山在府城南與今府治屹對謂之南山為宜今人以南鎮公祠在會稽山南即以唐所封鎮山

遊為南山又為會稽山也吳越春秋云越王無餘國在南山之陽太平御覽以越王無餘之舊都繫之秦

望山此為冒證咸平中陸叅撰法華山碑云夏后氏  
巡狩越山方名會稽後世分而為秦望釐而為雲門  
法華其實一山然則秦望亦可以會稽名之自秦始  
皇登此山以望南海又陟天柱之高峰以望秦中始  
有秦望望秦之名而秦望最著十道志秦始皇登秦  
望山使李斯刻石其碑尚存姚令威叢話云予嘗上  
會稽東山自秦望山之巔並黃茅無樹木山側有三  
石笋有水一泓別無他石笋上並無字以此訂之始  
皇所刻石不在此山明矣舊經會稽之別峰曰茅  
峴此山之南亦有譙峴茅譙音近似疑傳之訛也

望秦山在縣東南三十二里舊經云秦始皇與羣臣登

此以望秦中也一名天柱峰一名卓筆峰蓋會稽山

之別峰下有錢遜王儋墓

或疑望秦山一名天柱峰即宛委山之一峰也然舊

經以望泰山列秦望山之次今因之元微之望海亭詩云兩峰闕立秦望雄自注兩峰謂秦望望秦二山王龜齡賦亦云山有秦望而望秦

宛委山在縣東南一十五里舊經云山上有石匱壁立千雲升者累梯而至十道志石匱山一名宛委一名玉笥有懸崖之險亦名天柱山昔禹治水歌功未成乃齋於此得金簡玉字因知山河體勢水經云玉笥竹林雲門天柱精舍並疎山為基築林栽宇割澗延流盡泉石之好太平御覽云會稽石匱山上有金簡

玉宇之書夏禹發之得百川之理山下有棲神館唐

改為懷仙館今為龍瑞宮道書云陽明洞天一云極

玄太女之天山巔有飛來石其下葛仙翁丹井山南

葉天師龍見壇

太史公上會稽探禹穴史記注云禹至會稽因葬焉上有孔穴民云禹入

此穴自舊經諸書皆以禹穴繫之會稽宛委山里人以陽明洞為禹穴今無所攷惟唐鄭紡書禹穴二字元微之銘而魴序之然昌黎送惠師云嘗聞禹穴奇東去穿甌閩越俗不好古流傳失其真則禹穴不可定名久矣舊經引遁甲開山圖云禹治水至會稽宿衡嶺宛委之神奏玉匱書十二卷禹開宛委山得赤珪如日碧珪如月各長一尺二寸吳越春秋引黃帝中經云東南天柱曰宛委赤帝在闕其巖之巔歟

以文王覆以磐石其書金簡玉字編以白銀皆琢其  
文及禹巡衡岳血白馬而祭之夢見赤繡衣男子自  
稱玄夷使者聞帝使命于斯故來候之倚歌覆醺之  
山顧謂禹曰欲得我神書者蘇於黃帝皇巖之下三  
月庚子登宛委山發金簡之書按金簡  
玉字得通治水之理俚說不經故錄之

射的山在縣南一十五里舊經云山西石室乃仙人射  
堂也東峰上有射的遙望山壁有白點如射侯土人  
常以占穀貴賤語曰射的白米斛百射的玄米斛千  
其石室深可二丈遙望類師子口俗謂之師子巖太  
平御覽云射的山半石室之東高巖臨潭有石的岫

形其圓明視之如鏡唐李白詩云仙人居射的道士  
住山陰

白鶴山在縣南一十五里一名箭羽山孔靈符會稽記  
云射的山西南水中有白鶴山此鶴嘗為仙人取箭  
曾刮土尋索遂成此山漢鄭弘少貧賤採薪為業嘗  
於山中得一遺箭羽鏃異常心怪之頃之有人覓箭  
弘以還之後遂得朝南風暮北風也

鄭弘南北風事  
見樵風涇注

石帆山在縣東一十五里舊經引夏侯曾先地志云射

的山北石壁高數十丈中央少紆狀如張帆下有文  
石如鷄一名石帆十道志云山遙望如張帆臨水謝  
惠連汎南湖至石帆詩云漣漪繁波漾參差層峰峙  
南湖即今鏡湖也宋之問詩云石帆來海上天鏡出  
湖中

赤堇山在縣東三十里舊經云歐冶子為越王鑄劍之  
所越絕云赤堇之山破而出錫若耶之溪涸而出銅  
吳越春秋薛燭曰赤堇之山已合無雲文選張景陽

七命云耶溪之鉞赤山之精赤山即此一名鑄浦山  
若蕢山在縣東十二里舊經云秦皇東遊於此供芻草  
俗呼遼門山

寶山在縣東南三十里一名上皋山今攢宮山也東接  
紫雲山昔有龍憩山上紫雲乘之旁聯錫山產錫之  
所南抵下皋富盛山西北接龍尾若蕢諸山山崦有  
趙家嶼一名趙樂嶼西塘裏城今禁園內陵兆所宅  
乃其地也山巔號白鹿尖新婦尖雞籠山五峰嶺其



對案曰梅李尖自寶山東七里有巨石中圓竅深可  
一尺廣可四尺號鳳皇窠昔鳳生雙雛從此翔去今  
山下有上鳳村下鳳村亦名鳳林方勺泊宅編云會  
稽山為東南巨鎮周回六十里下瞰鏡湖有山橫抱  
如几案案外尖峰曰梅李尖地理家謂之筆案當勺  
所著在宣和建炎中尚未卜宮陵也矧十餘里間憩  
龍雛鳳產錫蓄寶實儲慶錫羨於今日豈偶也哉  
自龍尾山五峰嶺青山等名皆舊經所不著上舉山  
即寶山也龔頤正稽古錄紹興府攢宮號寶山是也

紫雲山在縣東南五十里舊經云昔有遊龍憩此山中常有紫雲起故以為名

富盛山在縣東四十里

下皋山在縣東三十里

錫山在縣東五十里舊經云越王採錫於此

舊傳山出鉛銀或垵

鑿取之忽山嘯摧歷數十丈今迹存焉其後里人無敢採者此山去寶山不遠意寶山之名或取此

白鹿山在縣東南二十九里越絕云在大山之南

若耶山在縣東南四十四里舊經云葛玄學道於此

山晉謝敷傳後還南山若耶中宋何胤居若耶

山山發洪水樹石漂拔其室獨存山下有潭潭上有

石號葛仙石

舊經云葛玄所隱桐几化成白鹿三足共行兩頭各更食十道志云葛玄於此

山井仙所服白桐几化為兩頭鹿一頭食草一頭望人

何山在縣東南四十七里即何胤所居

雞山在縣東南五十里俗稱雞籠山越絕云雞山在錫

山之南句踐蓄雞於此將伐吳以食士也

鶴鳴山在縣東南五十七里郡國志云山上時有鶴鳴

洞浦山在縣東南二十四里舊經云即湖南龍尾山西  
南之趾

陶宴嶺在縣東南四十四里舊經云陶弘景隱於此山  
有巨石高數丈傳云昔為任公釣磯

日鑄嶺在縣東南五十五里地產茶最佳歐陽文忠歸  
田錄草茶盛於兩浙兩浙之品日鑄第一黃氏青箱  
記云日鑄茶江南第一華初平云日鑄山茗天真清  
烈有類龍焙昔歐冶子鑄五劍采金銅之精於山下時

溪涸而無雲千載之遠佳氣不泄蒸於草芽發為英  
榮渟味幽香為人資養也

葛山在縣東一十里越絕云句踐罷吳種葛使越女治  
葛布獻吳王夫差也吳越春秋云句踐種葛於此採  
葛人歌曰嘗膽不苦味若飴令我採葛以作絲

銅牛山在縣東南五十八里夏侯曾先志云射的山南

銅牛山即越王鑄冶處

舊注云昔銅牛見於靈祀橋人逐之奔入此山掘地視之

悉銅屑也又云舊有黃牛於此山歌草樵人見之謂是民家所牧或驅之失所在太平御覽云事出孔照

會稽志

嶠山在縣東七十里舊經云漢駱夫人學道於此昇仙

有石室石井丹竈存焉嶠音豪

上虞縣嶠山名  
同今兩存之

雲門山在縣南三十里舊經云晉義熙二年中書令王子敬居此有五色祥雲見詔建寺號雲門今為淳化雍熙顯聖廣福唐益東野詩云碧嶂幾千繞清源萬餘流蓬瀛若彷彿四野多泛浮杜子美詩云若耶溪雲門寺青鞋布襪從此始山有謝敷宅何公井好泉

亭王子敬山亭智永禪師臨書閣

土城山在縣東六里吳越春秋越王使相者求美女於  
國中得之苧羅山鬻新之女西施鄭旦飾以羅縠教  
以行步習於土城教於都巷三年學服而獻吳王舊  
經引州僚記云越王作土城以貯西施即此山下有  
浣紗石

犬亭山在縣東南三十里舊經云越王畜犬獵南山白  
鹿即此越絕云句踐畜犬獵南山白鹿欲得獻吳故

曰犬山其高為犬亭

稱山在縣東北六十里舊經云越王稱炭鑄劍於此越絕云句踐時采錫於山為炭稱炭聚載從炭瀆至鍊塘各因事名之俗呼稱心山

鄭弘山在縣東南三十里弘仕後漢為太尉

鹿池山在縣東南八里鏡湖中舊經云山中昔有白鹿故名一云越王養鹿於此俗呼鹿墅山

刻石山在縣西南七十里一名鵝鼻山自諸暨入會稽



此山為最高晉王彪之會稽刻石山詩云隆山嵯峩崇巒崔嵬傍覲滄洲仰拂玄霄文命逮會風淳道遼秦皇遐巡邁茲英豪宅靈基阿銘跡峻嶠蓋秦皇刻石頌德宜在此山姚令威叢語云自秦望行小徑至一山俗名鵝鼻山頂有石如一屋挿碑其中文皆為風土所剥隱約就碑可見闕畫如禹廟沒字碑之類不知此石果秦石歟或云大篆小篆皆不可攷事見碑

類叢語又云鵝鼻山險絕人罕至者得一採藥引之方至山西北屬山陰界

太平山在縣東南七十八里晉謝敷隱居太平山中十

餘年以母老還南山若耶中

太平山有三一在會稽一在餘姚一在上虞上

虞之太平山一名傘山惟餘姚之山最著謝敷所隱屬會稽或上虞未詳今繫於此從舊經也

儲山在縣東南一百四十里周處風土記云越王供儲

在此又云張瑤種田立廬倉於山中故名之俗稱粟

山

六山在縣北一十四里一名句踐山越絕書云句踐鑄

劍銅不鑠埋之東坂其上生馬箠句踐遣使者種六

山飾治為馬箠獻吳王即此地

舊經云唐天寶六年改為句踐山今從越

絕曰

六山

脊山在縣南四十三里

姚山在縣東南一十五里山南二里又有姚嶺

大白山在縣東南七十五里

小白山在縣東南八十里

茅峴在縣東南一十五里茅君隱於此一名玉笥出美

玉其形如笥山陽一峰狀如香爐又謂之香爐峰

茅峴

與會稽山接舊經會稽山一名苗山亦名茅山疑只此山然舊經茅峴有香爐峯蓋會稽山之別峯也今因之

稷山在縣東五十三里舊經穢山一名稷山越王種菜於此後漢謝夷吾為穢鄉耆夫即此越絕云稷山句

踐齋戒臺也十道志云一名棕山

隋書會稽郡有稷山重山會稽山蓋

稷山山之著者

幹山舊經云山南有許詢宅十道志許詢宅側許公巖之南有落星石

陰山舊經云秦始皇移在會稽山之北有陰山之稱  
橫山在縣東三十四里舊經云山有草莖赤葉青人死  
覆之更活寰宇記載同一云神異經東方朔云

少微山在縣東一十二里職方郎齊公唐居也顧內翰  
臨序職方集云鑑湖東北有山巋然公親率筭畚栽  
培其上而闢其下為寢疏泉為沼植花卉果蔬為圃  
與湖之西南會稽山禹祠相望為山水奇偉之觀自  
名其山曰少微山

方干島在縣東南五里唐方干別墅也干咸通中居越  
中有詩云沙邊賈客喧漁市島上潛夫醉筍莊鄭谷  
題方干別墅云野岫分開逕漁家並掩扉今鏡湖中  
小山是已

尚書鴈在縣東南三十三里寰宇記云孔稚圭之山園  
也稚圭字德璋會稽人仕宋為都官尚書

穀來嶺十道志云舜耕於此天降嘉穀之處嶺以此名  
刺涪山在雲門南山不甚高而登其上則見雲門陶宴

諸山林立在下又山頂有池大旱不涸

山陰縣

塗山在縣西北四十五里舊經云禹會萬國之所按史記國語禹會諸侯於會稽執王帛者萬國防風氏後至禹誅之史載仲尼之言曰越人得其骨節專車書曰禹娶於塗山注塗山國名左傳禹會諸侯於塗山杜預注在壽春縣東北說者云今濠州也蘇鶚演義云塗山有四一會稽二渝州也南舊江州三濠州四

當塗縣又引文字音義云僊山音塗塗古國名既為古國禹娶之宜矣自越絕等書皆云禹娶于會稽塗山應劭曰在永興北永興今蕭山縣也吳越春秋又兼載塗山之歌其說不經大氏渝濠宣越之塗山皆有禹迹蓋禹之濬川雖嘗徧歷海內其會諸侯於會稽則信而有徵至娶婦處則好事者傳會於此非其實也又柳子厚山銘東坡廟詩乃在渝濠非此之謂侯山在縣西四里舊經云南湖侯山迥在湖中俗名九



里山蓋昔時去縣之數也孔愉少棲此山後官至車  
騎封侯論者以愉致侯之兆見於此晉孔愉傳愉山  
陰人為會稽內史在郡三年乃營山陰湖南侯山下  
數畝地為宅草屋數間便棄官居之山有孔太守廟  
蘭渚山在縣西南二十七里王右軍脩楔序云此地有  
崇山峻嶺茂林脩竹

陳音山在縣西南四里一百五十步舊經引吳越春秋  
云范蠡進善射者陳音楚人也王曰盡子之道願子

悉以教吾國人音曰道出於天事在於人人之所習  
無有不神於是乃使音教士習射於北郊之外三月  
軍士皆能用弓弩之巧音死王傷之葬於國西號其  
墓所曰陳音之山其冢悉畫騎射之形今對塘頭亭  
南湖中一山首北望者是也

冢字記以陳音山  
屬上虞縣非也

亭山在縣西南一十二里舊經云晉司空何無忌為郡  
置亭於山上

蜀阜山在縣北三十五里舊經云自蜀飛來帶兒婦二

十餘人隨山而至善織美錦自言家在西蜀今忽至此或云句踐將伐吳置婦女於山以邀軍士後人以婦訛為阜也十道志云句踐以寡婦居此令軍人遊焉一名獨婦山

法華山在縣西南二十五里舊經云義熙十三年僧曇翼誦法華經感普賢應現因置寺今為天衣禪院山有十峰咸平中裴使君莊各命以名一法華二衣孟三積翠四朝陽五雲門六倚秦七天女八猿嘯九起

雲十月嶺山下二溪東北流冬夏不竭唐李邕碑云  
其峰五連其溪雙帶蓋謂此也萬齊融碑云雙鳥所  
以示兆今尚翔鳴舊經云山有雙鳥雛長則送出之

舊經法華山在會稽  
縣南四十里後正之

容山在縣西南二十七里

羊石山在縣西三十六里山有石如羊

柯山在縣西三十一里

人安山在縣北四十六里舊經云舊馬鞍山以形似馬

鞍也天寶七年改為人安山

鎚頭山在縣北四十一里以形似故名

巫山在縣北一十八里舊經巫山一名梅山越絕書云

巫山者越魑神之官死葬其上朱育對濮陽興曰越

王翳遜位逃於巫山之穴越人薰而出之陸左丞農

師適南亭記云梅山昔子真之所居也其少西有里

曰梅市其事應史山西南有永覺寺梅子真泉適南

亭竹徑茶鵑

石匱山在縣東南一十五里舊經云山形如匱禹治水畢藏書於此

五峰山在縣南三十二里

西余山在縣西北四十二里

烏風山在縣西北四十九里

聖女山在縣西二十九里

茅巖山在縣西南三十三里

石城山在縣東北三十里吳越備史乾寧三年錢鏐討

董昌攻石城去越三十里即此今山下有石城里

檀宴山在縣東十道志云謝靈運游宴處今人往往聞

簫笙之音

下馬山在縣北二十七里舊經云秦始皇息駕於此一名蝦蟇山按此山四面皆水非息駕之所疑其音訛為下馬遂有息駕之說

梅里尖山其陰為梅仙隍多桃李梨梅來禽以梅福里得名自隍度一小嶺有異境煙水直至郡城與卧龍

相直

磴山有石泉在竹樹陰中甘寒可瀹茗山形如磴故得名

六峰山有溪出山麓產楊梅居民百餘戶

頂里山有溪清澈居民二百餘戶產楊梅與六峰埒其號何塔者尤奇

戴兩山遠望若兩山其實一也居民二百戶或云舊有戴于二姓居之



何山有塔久廢今復營之頗增湖山之麗

玉架山三峰如筆格故得名秀麗可畫

花涇山多桃李及柳望之如錦繡包絡山谷

直步山多蘚梅亦產楊梅下有溪入鏡湖

徐山姚嶼昔小山財如岡阜多桑竹在鏡湖中

彈丸山以其狀名下有方隄渡

甌山兩山相類正如兩酒榼

海山多桑竹下有居民三四十戶以漁釣為業

蜀山爾雅曰獨山謂之蜀山郡境多此名古語也

鳳凰山在梅市鄉至小而具山形嘗有鳳集焉

玉山在縣北三十三里舊經云唐貞元元年浙東觀察

使皇甫政鑿此山為斗門入間泄水入江按唐書地

志山陰縣北三十里有越王山堰皇甫政鑿山以畜

泄水利與舊經相合即此

舊經山陰縣北二十八里又一玉山乃重複今刪之

琵琶山在縣南五里

烏土山在縣西南四里

三山在縣西九里地理家以為與卧龍岡勢相連今陸氏居之嘗發地得吳永安晉太康古甎疑昔人嘗卜築或嘗為寺觀云

嵎縣

剡山在縣北一里縣治處其坳山下園囿亭館白樂天沃洲記云東南山水越為首剡為面其山巔屹起小峰號白塔俗傳秦始皇東遊使人斲此山以泄氣今土坑深千餘丈號剡坑山北有戴顓墓

大白山在縣西六十里舊經云此山峻極崔嵬吐雲含

景與小白山接乃趙廣信煉九華丹登仙之處有白

猿赤獬又有鳥似鷄文彩五色口吐綠綬長數尺號

吐綬鳥雙石笋各長五六丈對立如門瀑泉飛下號

瀑布嶺土人亦稱西白山

按宋書褚伯玉隱身求志居剡縣瀑布山三十餘載

揚州辟議曹從事皆不就意瀑布山之在剡即此華初平瀑布嶺詩序云在嵊縣西六十里福善所築蔚有靈氣昔產仙茗寰宇記瀑布嶺屬餘姚縣蓋此山聯接餘姚縣界

小白山在縣西六十里真誥云趙廣信陽城人魏末渡

江來此山師李法成服氣又受師左君守中之道徹  
視五藏或入城市賣藥莫知其年歲後白日升天山  
有丹井今存

刻石山在縣南三十里十道志云一名穿山相傳以刻  
石為名不知文字所在昇明末縣人倪襲祖行獵見  
山上有文凡三處苔生其上刮苔視之其大石文曰  
黃天皇蕭字道成得賢師天下太平舊經云或言衛  
夫人碑墮此中因以為名唐寶曆元年觀察使元稹

使人訪碑不獲山半有井井有蛟

丹池山在縣東七十二里舊桐栢山唐天寶六載改為  
丹池道經云上有桐栢合生下有丹池赤水南岳真  
人云越有桐栢金庭與四明天台相連神仙之宮也  
真誥曰桐栢山高一萬五千丈周回八百里四面視  
之如一其一頭在會稽東海際其一頭入海中是金  
庭不死之鄉在桐栢之中方四十里上有黃雲覆之  
樹則蘇紆珠碧泉則石髓金精其山臺盡五色金也

經丹水而行有洞天從中過在剡臨海二縣之境

按

栢山在天台金庭山在剡書又以金庭為桐栢真蹟所道一頭在會稽東海頭一頭謂入海蓋其山隴聯

屬故

石鼓山在縣東五十里有石鼓神祠白樂天沃洲記云

北對四明而金庭石鼓介焉

諸暨縣有石鼓山名同各存之

簞山在縣東三十一里有白巖神祠并龍潭祈禱有驗

舊經云山遙望之如鋪簞

動石山在縣東北五十里下臨溪有石數百天欲雨石

必先動

嶠山在縣北四十四里舊經引輿地志云自上虞七十里至溪口從溪口隨江上數十里兩岸峻壁極險乘高臨水深林茂竹表裏輝映名為嶠嶠奔瀨迅湍以至剡也水經云嶠山與嵎山接其間瀕澗懷煙泉溪引霧吹畦風馨觸岫延賞王元琳謂之神明境事見謝康樂山居記水經注又云嶠山有成功嶠嶠壁立臨江歌路峻狹不得併行行者牽木稍進不敢俯視



嶠西有一孤峰飛禽罕至山頂樹下有十二方石地  
甚光潔嘗有採藥者沿山見通蹊至此還復更尋遂  
迷前路

車騎山在縣東四十七里舊經云晉車騎將軍謝玄為  
會稽內史嘗於此山立樓居止後人因以為名水經  
云嶠山東北太康湖謝玄舊居右濱長江左傍連山  
平陵脩通澄湖遠鏡於江曲起樓樓側悉是桐梓森  
聳可愛號桐亭樓山中有三精舍高甍凌虛垂簷帶

空俯眺平烟杳然在下水陸寧晏足為避地之鄉江  
有琵琶圻圻有古冢墮水甃有隱起字云筮吉龜凶

八百年落江中謝靈運取甃詣京師盛傳觀焉

舊經引謝

靈運經此有詩云曩基即先築故池不更穿果木有  
舊行壞石無遠延按此詩康樂還舊園作贈顏延年  
自注即始寧園也始寧今上虞縣有  
西莊別墅存焉然舊經載於此未詳

嵯山在縣東三十四里水經云山下有亭亭帶山臨江

松嶺森鬱

了山在縣東北一十二里南有餘糧嶺其地產禹餘糧

榆樹山在縣西北八十里

槌山在縣西七十五里

子周山在縣西北七十里

葛峴山在縣西北二十里

諸暨縣

長山在縣西一里夏侯曾先地志云山高五千餘丈其

頂平博有石室可坐百人南范蠡壇陶朱公廟東法

樂寺

苧羅山在縣南五里輿地志云諸暨縣苧羅山西施鄭  
旦所居其方石乃睬紗處十道志句踐索美女以獻  
吳王得之諸暨苧羅山賣薪女西施山下有浣紗石  
太平御覽云羅山今名苧羅山山足有王羲之墓孫  
興公文王獻之書碑今不存

苧羅山一在蕭  
山縣今並存之

衡山在縣西南二十里舊傳有彌勒佛古迹

覆斗山在縣南五十里

東白山在縣東九十里一名太白峰連跨三邑其在剡

曰西白在東陽曰北白

櫛山在縣西一十八里山多櫛木一名諸山

金鵝山在縣南五十里舊經云昔有金鵝自此山飛入

吳郡

烏帶山在縣東北四十五里山出紫石英舊經云晉謝敷夜夢神人語曰當以珍寶相贈至明視床下有異石而瑩乃紫石英也舊名烏簞山梁武帝遣烏簞採石英終於此後人立廟祠之帶簞聲近蓋俗之誤也

杭烏山在縣北七十五里舊經云疊嶂七十二有石冢  
大石為門其平如削傍有杭烏刺史廟一峰特高風  
雨晦冥常聞樂聲號鼓吹峰又有池或時龍見

句乘山在縣南五十里舊經云句踐所都也國語云越  
臣於吳吳更封越南至句乘即此地其山九層亦名  
九乘山南有句乘亭

浮塘山在縣南四十五里

九江山在縣北二十五里舊經云山有石室幽邃其四

壁刻石為女人號靈女臺

石鼓山在縣南五十里山下盤石如鼓扣之有聲山多

黃精白朮竹箭

嵎縣有石鼓山  
名同各存之

黃蘗山在縣東南九十五里以山多黃蘗故名

大巖山在縣北九十里

巖崖山在縣北五十里

雞冠山在縣西五十里山形如雞冠出奇石其紋若星

月花獸山有玉女冢一名高冢

細辛隴山在縣南九十八里山多細辛

五泄山在縣西五十里自山五級泄水以至溪山川最  
為秀絕

寶掌巖在縣東南四十五里寶掌禪師所居也一名千  
歲巖禪師知名氏自云生於周末當魏晉間由西  
域入蜀貞觀十五年開巖於此周顯德二年正月遷  
化壽一千七十二歲真儀在半巖去地四十九尺石  
室可容百餘人洞內石版數片如削傳云里人沐浴



之所禪師種貝多木一枝亦數百年矣

金雞山在縣南五里

北禪師巖在縣南四十五里寶掌巖側

范公巖在縣南九里陶朱公所遊歷也巖有洞

### 蕭山縣

蕭山在縣西一里西漢地志云蕭山潘水所出東入海  
舊經云許詢嘗登其山憑林築室蕭然自放乃名蕭

山

北幹山在縣北一里舊經云晉許詢家於此山之陽其  
詩云蕭條北幹園

翠嶂山在縣西二十五里一名夏駕山舊經云山出菰  
草織以為席甚細密多接者為精山在夏駕湖湖去

海止數里

舊經上虞縣夏蓋山一名夏駕山  
亦去海數里疑與此同今俱存之

荏山在縣東北一十一里舊經云越王種荏於此

黃竹山在縣東三十三里舊經云范蠡遺鞭於此山生  
筍為林竹色微黃狀如刀削

洛思山在縣東四十三里輿地志云永興縣洛思山先是洛下人隨朱雋來會稽三年不得返乃登山北顧而歎或云雋遭母喪止葬此山請洛下圖墓師相地師去鄉既久目極千里北望洛京號呼而絕因葬山頂故以為名寰宇記太平御覽所載略同

乾薑山在縣西四十里舊經云山北有泉冬夏不竭清白於餘水越王用此水造薑

摩烏山在縣南二十里舊經引東方朔神異經此山是

亞父割斷蕭山南嶺將摩於烏江也江東以擲為摩  
航烏山在縣西四十七里舊經云句踐之航也三百石  
長員卒七十人渡之一曰舸烏山

連山在縣西一十二里舊經云連山長岡九里西北至  
定山秦始皇欲置石橋渡浙江石柱數十列於江際  
其傍別有小山號石井山

吹樓山在縣東四十里一名樓山一名岵市山

螺山在縣東二十里舊經云山似螺故名有會稽內史

夏靜墓

菊山在縣西三里山多菊故名唐永泰中縣令李萼尉  
丘丹登此山因名菊山

茗山在縣西三里山多茗下有二塘

臨江山在縣東南二十里舊牛頭山天寶中改此名諺  
云牛頭芋羅一日三過謂舟行信宿猶經舊處也山  
南有石室

去虎山在縣北五里山有猛虎常傷人一夕負子渡江

西去縣令杜守一以名其山時景德四年六月晦也

三臺山在縣南五十里山有臺三所故名

苧羅山在縣南三十里有西子廟

一在諸暨縣  
今兩存之

龕山在縣東五十里

慈孤山在縣東四十里

石巖山在縣西南一十五里

東蜀山在縣東一十里

西蜀山在縣南一十五里

峽山在縣南六十里其山八面皆向江有鷄籠石石有紅影略如鷄形故諺曰金鷄影山也

許元度巖在縣西南八十里晉許詢所居也

餘姚縣

秘圖山在縣北六十七步舊經云上有石匱夏禹所藏

靈秘圖之所舊號方山天寶六年改今名上有嚴公

堂高風閣皆以子陵而名

此山舊為壽聖觀北縣治在其南麓觀既廢於建炎

兵火遂以弓手營地為廣福觀易之以廣縣治

四明山在縣南一百十里高二百二十丈周回二百一  
十里山四傍皆虛明玲瓏如牖故名孫綽天台賦云  
涉海則有方丈蓬萊登陸則有四明天台今奉化鄞  
山皆此山之脈也唐皮日休詩云穴開自真宰四達  
見蒼崖山有九題石窻過雲雲南雲北鹿亭樊榭潺  
湲洞青櫺子鞠侯是也日休與陸龜蒙俱有詩

山與上虞

接舊經上虞縣有四明山今兩存之

竹山在縣東南五里



羅壁山在縣南一十八里舊經引孔曄記云山有虞國  
墅襟帶山溪表裏疇苑洛陽人來云巖囿天勢具體  
金谷都太宰遍游諸境棲情此地每至良辰携子弟  
遊憩後以司空臨郡遂卜居之

懸泥山在縣北六十里孤峙海中其上多橘下有湧泉  
冬夏不竭

靈緒山在縣西一里一名嶼山孔曄記云山有三足白  
鹿昔虞翻嘗登此山望四郭誠子孫曰可留江北居

後世祿位當過於我聲名不及爾然相繼代興居江南必不昌今諸虞氏由此悉居江北也山巔有葛仙翁井及山晉有徵泉未嘗竭名龍泉在龍泉寺中王荊公少時隱居讀書於此題二絕句說者謂其有公輔之器元章簡公絳赴郡晚泊題云江上潮聲送落暉江邊倦客拂塵衣勞生俗事何時了不送山雲自在飛

渚山在縣西三十里舊經云秦始皇飲馬於此

姚丘山在縣西北六十里舊經云舜母握登感虹生舜之地又引周處風土記以為證三朝國史云餘姚縣有姚丘山

虞山在縣西三十里舊經嘗引太康地志云舜避丹朱於此與史不合

吳女山在縣西三十八里周七十里舊名娥眉山天寶六載改今名

鵝山在縣西南一十二里舊經云支道林居剡每名辰

遠來臨山或問之荅曰謝安石昔來見就輒移旬日  
今觸情舉目不覺欣想後病甚遂移來臨中僧史云  
支遁嘗經餘姚臨信宿彌日不去或問其意曰昔安  
石相從未嘗不移旬今觸情是愁耳乃移臨中永和  
元年閏四月四日沒葬於臨中

支道林葬處今泯世  
說云永和九年支終

於剡之石城山戴逵過其墓曰德音未遠拱木  
已積僧史載其語繫之臨山未詳姑兩存之

太平山在縣東南七十里輿地志云餘姚縣有太平山  
山形似繖四角各生一種木不雜他木一角櫟一角

純粹一角純樞有道士舊築居山上穢身者來輒飛  
倒自非潔齋不敢至焉藝文類聚餘姚江源出太平  
山東至陝江口入于海孔稚圭詩云陰澗落春榮寒

巖留夏雪即此

太平山有三一在會稽一在上虞一在餘姚而餘姚之山最著謝敷居太

平山不著何所但云會稽人故繫之會稽然敷所居或恐即此梁杜京產居曰門山陶弘景有太平山日門館碑云吳郡徵杜君拓宇太平之東菁山之北爰以幽奇別就基址栖集有道多歷世年蓋京產所居日門亦太平山之別名也

大小黃山在縣東二里

九里山在縣東九里

西石頭山在縣西二里社稷壇在其左

童山在縣西三里

大小雷山在縣南二十里

殿山在縣南十五里

屯山在縣北十五里

松山在縣北二十五里

栢山在縣北三十里

眉山在縣北三十五里海中望之如修眉故名

廟山在縣北五十里

白山在縣東南五

闕

化安山在縣東南二十里

白水山在縣東南六十里

歷山在縣西北八十里舊經云在會稽縣東南昔舜耕  
所也又云越有歷山舜井泉田者以舜之餘族所封  
舜姚姓故曰餘姚蓋其子孫思舜鄉取像於此亦猶

漢新豐之義蓋此山雖非舜之耕所亦因舜而得名也王介甫歷山賦序云餘姚縣人與季父爭田予為直之將歸閔然望歷山而賦之歷山在上虞界中按此山實屬餘姚介甫謂在上虞界中誤矣

蘇鶚演義云歷山有

四一河中二齊州三冀州四濮州雷澤又其二不聞又云耕之與漁宜皆在雷澤史記注云歷山在河東漁澤今歷山陰然則舜之所耕不在明矣演義云歷山其二不聞宜此山乃其一耶梁江文通題歷山詩云愁生白露日思起秋風年落葉下楚水別鶴噪吳田嶂氣陰不極日色虧半天酒至情蕭瑟憑尊還惘然文通會稽永興人所題乃此山也



大蘭山在縣東南八十里傳云劉樊夫婦於此山仙去  
靈源山在縣西南三十里有泉曰靈源故名

烏膽山在縣西南四十里

山與上虞縣接於上虞互見

風山在縣西北一十里廣四十里十道志云山少木多

石通于始寧及剡

東明山在縣西南五十里

白雲山在縣西南六十里

冶山在縣東北二里傳云歐冶子鑄劍之所

會稽縣志董山鑄浦

皆傳歐冶子鑄  
劍處今並存之

陳山在縣東北一十五里有嚴子陵墓靈瑞塔山下泉  
名華清

石匱山在縣東六十里傳云禹藏書於此山有大石礪

硯其形如匱

會稽縣宛委山一名石匱山陰  
縣南亦有石匱山今並存之

安山在縣東北一十里

石人山在縣東北四十五里山下有洞

破山在縣東北六十里一名三山

嶼山在縣東北三十里

仙居山在縣東北六十里一名榜桡山

聖龜山在縣西北二里一名打石山

鎮劍山在縣西北四十里

烏山在縣西北二十里

姜山在縣西北五十里褒十里山有五峰曰金鷄曰娥

眉曰積翠曰凌雲曰白馬山下有姜女泉精舍

熨斗山在縣西北二十五里

何山在縣西北四十里

上虞縣

傘山在縣南五里一名太平山舊經云形如傘也吳道

士于吉築館於此山巔平行有良疇數十頃橫塘溉

之無水旱

太平山有三一在會稽一在餘姚一傘山亦名太平山舊經云此山在餘姚縣西南

一百一十里  
考之的然

上申山在縣南四十里

昇相山在縣南三十五里山巔瀑布號白水

蘭穹山在縣西北二十五里一名蘭風舊經云葛洪嘗  
栖隱於此有石井丹竈山多石少木四望迢遙有形  
勢自東西眺之則正方寰宇記云琅邪王弘之垂釣  
之地宋王弘之傳性好釣上虞江有三石頭弘之常  
垂綸於此人問得魚賣否答曰釣自不得得亦不賣  
東山在縣西南四十五里晉太傅謝安所居也一名謝  
安山巋然特立於衆峰間拱揖蔽虧如鸞鶴飛舞其  
巔有謝公調馬路白雲明月二堂址千嶂林立下視

滄海天水相接蓋絕景也下山出微徑為國慶寺乃  
太傅之故宅傍有薔薇洞俗傳太傅携妓女游宴之  
所又山西一里始寧園乃謝靈運別墅一曰西莊按  
謝安傳云寓居會稽與王羲之許詢支遁遊出則漁  
獵山水入則言詠屬文後雖受朝寄然東山之志始  
末不渝靈運傳云父祖並葬始寧山中并有故宅及  
墅遂移籍會稽故其詩云偶與張邴合久欲還東山  
又云分離別西川迴景歸東山注謂會稽靈運之所

居也蓋太傅始居此及出鎮新城欲造泛海之裝自海道還東雅志未就而沒後卒葬焉今山西有太傅墓靈運自移籍會稽多在始寧其著山居賦云南北兩居水通涯阻注云兩居謂南北兩處南山是開創卜居之處傳云修營別業傍山帶江盡幽居之美今山半有洗屐池東西二眺亭雖後人好事為之然舊園別墅迹不可泯又舊經云梁徵士魏道微脩道得仙於謝安山南史杜京產與顧歡開舍授學於東山

下今距山一二里有杜浦顧墅

舊經云東山在縣西北三十里非也東山

因太傳而名者三一在臨安山中按傳云嘗坐石室  
臨濬谷悠然嘆曰此與伯夷何遠東坡詩云謝公含  
雅量世運屬艱難獨携縹緲人來上東西山今臨安  
縣東西巖石室存焉一在金陵按列傳云及登台輔  
於土山營墅樓館林竹甚盛每携中外子姪往來遊  
集建康志云謝安本居會稽東山後入朝乃於此營  
築以傲之山無巖石故名土山是二山雖太傳平生  
之所游歷非故居之東山也惟始寧東山乃其故居  
其證明甚世說王羲之語劉侯曰若安石東山志立  
當與天下共推之注引續晉陽秋曰安石家於會稽  
上虞縣優游山林六七年間徵召不至雖彈奏相屬  
繼以禁錮晏然不屑也自咸康初避召不起高以歷  
年所以放情邱壑正在此山自東漢末折上虞之始  
寧鄉為始寧縣至東晉有上虞始寧二邑陽秋所載



得其實矣王性之著東山記言東山之在會稽其證有七獨不援此為說豈偶遺之耶然晉宋諸賢居會稽剡中例稱東山阮裕居剡中有肥遁之志其在東山久之蕭然無事嘗內足於懷戴逵厲操東山王脩齡在東山甚貧乏道一道人從都下還東山支遁好鶴住東山何胤以會稽山多靈異居若耶山雲門世號胤為小山亦曰東山又何子朗等六人於東山受學梁虞寄領會稽郡輒致書陳寶應自稱東山虞寄然則會稽剡中若耶雲門皆可稱東山也今阮戴支遁遺迹在嵊縣何胤所居在雲門東山屬新昌縣凡山之處東皆可稱東山但不若此山因太傅而著爾王性之記云安石與戴逵同寓此東山恐別有據大抵晉宋人指會稽剡中皆曰東如太傅傳云棲遲東山又云海道還東是也

檀燕山在縣西南五十里舊經云神仙讌集之所上有

旃檀香氣襲人樵者或時聞管簫聲太平御覽山頂  
有十二方石悉如坐席許大皆作行列仙靈之所讌  
集也

釣臺山在縣西南七里舊經云山有槎大十圍昔陶公  
嘗乘此垂釣公既去槎墜於潭底不復浮矣

嶠山在縣西南四十二里舊經云漢東陽駱夫人於此  
上昇傍有井竈歲久蕪沒今山崖南有二白石土人

號日月石

會稽縣東七十里有嶠山云駱夫  
人學道之所舊經作駱大夫誤

指石山在縣西南四十五里舊經云上虞縣有立石所謂指石者俗呼為公嶄言舜登此石

夏蓋山在縣北五十里舊經云山形如蓋因以為名引輿地志云上虞縣北有夏駕山在湖中湖即名夏駕出苧草土人織以為席甚細密多接者為精識書云

夏駕山浮可避甲申水災湖北去海數里山北對海

鹽岸蓋一作駕蓋駕音近傳之訛耳

舊經蕭山縣翠嶂山一名夏駕

山在縣西二十五里有夏蓋湖湖北去海數里山北對海鹽岸餘並同

握登山在縣西南四十里山有握登聖母廟

象田山在縣西南四十里周四十餘里山平行俗呼小

天台南有舜井

大雷尖山在縣南一十里十道志云一名百樓山山腰有平地數十丈漢魏伯陽嘗築居於此

石壁山在縣西南四十五里十道志其南小山山形方正如樓號鼓吹樓寰宇記云山有飛翼樓謝靈運題石壁精舍詩云披拂趨南徑愉悅偃東扉注云精舍

讀書齋也

龍山在縣西二十五里

佛跡山在縣西北四十五里有石逕尺許深一寸如巨人足迹

長者山在縣南二里

蔡墓山在縣西一十二里或以為蔡邕墓山也按蔡邕傳邕陳留圉人亡命遠迹吳會文選伏滔笛賦云邕避難江南宿於柯亭之館取椽為笛又傳云邕過吳

讀曹娥碑則邕嘗至會稽郡然有墓於此未詳

裏嶼山在縣西南三十里

龍塘山在縣西南四十里一名鵝鼻山山有上下二潭

上潭泉脈不竭下潭多枯歲禱於此有驗里人結  
屋以覆之

崑崙山在縣西南四十里有神祠

羅巖山在縣北七里

羅壁山在縣北十里

餘姚縣南十八里  
山同今並存之

雙碁山在縣西南五十里俗傳二仙者沐浴對奕於此  
四明山在縣南四十里南史梁孔祐隱四明山見山谷  
中有錢數百斛視之如瓦石采樵者競取之入手即  
成沙礫有鹿中矢來投祐祐為泰之瘡愈而後去太  
平御覽李汾上虞人嘗入四明山讀書

餘姚縣南一百二十里山

名同今  
並存之

銅山在縣南二十五里

烏膽山在縣東一十五里

大雷山在縣西南六十五里

鳳凰山在縣西南六十里山有鳳穴

含珠山在縣西南五十里

鳳山在縣北三十五里山形如鳳

白道猷嶺在縣南五十里晉天竺僧白道猷卓菴於此  
孝間嶺在縣北十里昔嶺下有包舍居之以孝聞

### 新昌縣

南明山在縣南五里一名石城一名隱岳初晉僧曇光



棲跡於此自號隱巖支道林昔葬此山下齊僧護夜宿聞笙磬仙樂之聲梁天監中建安王始造彌勒石佛像劉勰撰碑其文存焉山有錢鏐所造三層閣寶相寺白雲莊白蓮菴齊顓井白鷗鴈石縫梅皆勝迹也

支道林葬處今泯按世說戴逵過林法師墓曰德音未遠拱木已積注云永和九年支遁終於剡之

石城山因葬焉今不知何所王珣詩序云予以寧康三年命駕之剡石城山即法師之墓也高攷鬱為荒塋丘隴化為宿莽遺迹未滅而其人已遠感想平昔觸物悵懷其為時賢所惜如此僧史云道林葬餘姚臨山未詳今兩存之

東岬山在縣東四十里晉僧法深支遁皆隱居此世說  
支道林好鶴住剡東岬山有人遺其雙鶴養成翮便  
使飛去又嘗就深公買岬山深公曰未聞巢由買山  
而隱

沃洲山在縣東三十二里晉白道猷法深支遁皆居之  
戴許王謝十八人與之遊號為勝會亦白蓮社之比  
也唐白樂天山院記云東南山水剡為面沃洲天姥  
為眉目唐韋應物權德輿送靈澈歸沃洲有詩序傳

馬山有靈澈杖錫泉西南養馬坡放鶴峰皆因支道林得名吳虎臣漫錄云沃洲天姥號山水奇絕處自異僧白道猷來自西天竺賦詩云連峰數十里脩林帶平津茅茨隱不見鷄鳴知有人晉宋之世隱逸為

多

寰宇記以沃洲山屬嵊縣今從正之

天姥山在縣東南五十里東接天台華頂峰西北聯沃洲山上有楓千餘丈寰宇記云登此山者或聞天姥歌謠之響道藏經云沃洲天姥福地也謝靈運詩云

瞑投剡中宿明登天姥岑李白詩云辭君向天姥拂  
石卧秋霜又夢遊天姥歌云天姥連天向天橫勢拔  
五嶽掩赤城天台四萬八千丈對此欲倒東南傾杜陵壯遊云剡溪蘊秀異欲罷不能忘歸帆拂天姥中歲貢舊鄉時少陵將辭剡西入長安也或云自剡至天姥山八十里歸帆拂之非也詩人之辭要當以意逆志大概言此山之高而已

南巖在縣西南二十里世傳任公子釣魚之所莊子任公子以五十犗為餌蹲於會稽投竿東海經年而得巨魚唐齊顓題南巖云南巖寺本滄海任公釣臺今

尚在巖側有任公釣車石棺蛻骨存焉人掘其地有螺蚌殼云巖下乃海門也

穿巖在縣西南五十里有十九峰排列如圖畫中峰有一圓竅東西通故名穿巖巖有石室廣二十餘丈


鼓山在縣西四十里山形如鼓

天嶽在縣西南七里

劉門山在縣東南三十里傳云劉晨阮肇自剡採藥至此山有劉阮祠山亭採藥還山下居民多劉姓者

石牛山在縣西三里

黃罕嶺在縣三十里唐咸通中賊裘甫寇浙東王式曰  
惟黃罕嶺可入剡然卒亦成擒甫果自嶺入剡兵遂  
敗



會稽志卷九